

DISSERTATIO INAUGURALIS MEDICA  
DE  
**SPASMIS  
PHARYNGIS**

Oder:

**Vom Krampf des Ober-Schlundes**

QUAM

CONSENSU

AMPLISSIMI ORDINIS MEDICI

PRÆSIDE

**DN. FRIDERICO HOFFMANNO**

ACADEMIÆ SENIORE ET FACULT. MED.

h. t. DECANO.

**PRO DOCTORIS GRADU**

PUBLICÆ ERUDITORVM DISQVIGATIONI  
SVBMITTIT

D. *Augusti Anni MDCCXXXIII.*

AVCTOR

**ANDREAS GOTTLIEB MARGGRAFF.**  
BEROLINENSIS.

---

HALÆ MAGDEBVRGICÆ

TPIS IOHANNIS CHRISTIANI BILLIGERI, ACAD. TYPOGR.



THE UNIVERSITY OF CHICAGO PRESS

# SPASMS PHARYNGIS

By DR. FREDERICO HOFMANN

AMERICAN EDITION

FREDERICO HOFMANN

PH.D. DOCTOR OF GRAD

MOREAS GOTTLIEB MARGRAVE

NEW YORK: THE UNIVERSITY OF CHICAGO PRESS, 1900





DISSERTATIO INAUGVRALIS  
MEDICA  
DE  
SPASMIS PHARYNGIS.

*PROOEMIUM.*



Medicinæ princeps Hippocrates in libro, quem de vetere inscripsit medicina, proditum nobis reliquit: medicos, si in externorum morborum cognitione fallantur, nullam prorsus excusationem mereri; si vero in iis, qui corporis penitiora occupant, & oculos effugiunt, dignoscendis decipi eos contingat, aliqua excusatione dignos esse; quod arduum omnino sit, quæ intus in corpore latent inspicere. Non omnino a veritate alienum videtur hoc assertum! Quamvis



enim nostro ævo multorum morborum, olim vel plane incognitorum, vel obscuris causis implicatorum vera indoles ac ratio clarius detecta sit ac in lucem protracta: attamen haud pauci restant, in quibus aut ignorantiam nostram profiteri debemus, aut in iis dignoscendis decepti aliquam meremur excusationem. Quot enim adhuc sunt ægritudines, quarum apud scriptores medicos aut nulla aut satis obscura sit mentio? Quis unquam vesicæ spasmos tanta perspicuitate explicaverat, quam *Excell. PRÆSES in diff. de vesicæ spasmis*? Inter hæc vero humani generis calamitates, quæ veritatem dicti Hippocratici adhuc dum corroborant, principem fere locum obtinent, quæ cibalem fistulam latinis gulam, græcis *διτοφάγειον* appellatam diris atque anxiiis infestant symptomatibus. Harum certe apud plerosque auctores tantum est silentium, aut saltem tam exigua explicatio, ut eas fere inter rarissimos morbos referres, quæ tamen inter frequentissimos omni jure collocandæ sunt. Quum enim canalis iste nerveus, membranosus atque musculosus vi suæ fabricæ omnibus istis affectibus, qui partes nerveas atque musculosas neque minus glandulosas occupare solent, sit obnoxius, horum quoque omnium insignes ac notabiles attenta experientia suppeditabit observationes,



nes. In iis vero illustrandis summa gratia debetur summæ *Excelb* PRÆSIDIS industriæ, qui in *disp. de morbis œsophagi* primus omnium hoc in distinctum redegit ordinem. Magnus enim eorum est numerus, ac immanissima symptomata: quibus recensendis eo magis hic supersedere licebit, quo clarius atque distinctius ab omni laude majori Viro in dicta dissertatione sunt explicata. Quin licet earum tantummodo adflictionum, quæ ex spasmodicis œsophago inhærere observantur, uberiolem tractationem exhibere vellemus; dissertationis transgredieremur limites. Quam obrem bono cum Deo constituimus pharyngis solummodo ac superioris gulæ distentiones inaugurali hac dissertatione perstringere: Quos conatus, ut divina clementia prosperos reddat atque salutares, humillime precamur.

## §. I.

**S**pasmos pharyngis explicaturi in medicorum quidem scriptis rariores, ipsa vero experientia admodum frequentes; quædam de spasmodicis œsophagi in genere præmonenda duximus. Per hos vero intelligimus invitam, præternaturalem atque violentam vel ipsius gulæ canalibus, vel illius principii, pharynx dicti, vel denique utriusque, hinc totius œsophagi constrictionem aut rigidam distentionem. Hinc ergo sponte fluit, rem curatius pen-



sitando, tres potissimum spasmodorum gulæ esse differentias: namque vel inferior gulæ pars, pharynge libero, cum adhærente ipsius orificio ventriculi superiore, sola convellitur; vel ea immuni, pharynx cum suis musculis aut solus, aut cum adnexis ipsi partibus larynge, radice linguæ, ossæ hyoide &c. constringitur: vel denique omnis gula cum partibus ipsi arctissimo vinculo junctis in gravem distentionem rapitur. Prior spasmi dici potest gulæ proprius, alter pharyngis, & tertius gulæ universalis. Vt vero haud inanem ac minus fructuosam hanc divisionem esse ostendamus, nec entia præter necessitatem multiplicasse videamur: singulorum notatu dignissimum in medium proferemus exemplum.

## §. II.

Spasmi gulæ universalis observatio exhibetur in *Excell. PRÆS. Med. consult. Tom. VIII. Dec. IV. Casu V.* & brevissime sic se habet: Verbi quidam divini minister ab obitu uxoris tristissimus semper, olim hypochondriacis spasmodicisque motibus, caput in consensum trahentibus obnoxius, tanta subito pectoris, gulæ, laryngisque constrictione prehendebatur, ut nec vocem edere, nec spiritum trahere, nec deglutire quicquam valeret, insuperque velut attonitus prosterneretur. Ab hac vero accessione media nocte invadente per sponte sequutos copiosissimos sudores prorsus liberatus; eandem tamen sequenti mane post largiter assumptum calidissimum potum Theebois iterum incidit; & quanquam variorum externorum usu adminiculorum ad rationis integritatem mox iterum rediret; retinuit tamen & loquendi impotentiam, & deglutiendi spirandique summam difficultatem. Adplicatis venæsectione, frictionibus, spiritibus nervinis, theriaca sub linguam posita, masti-



massificantibus, interneque anodynis, tenacissimus ac copiosissimus mucus non ore solum reddebatur, verum etiam quidem non vomitu, sed anxio tantummodo vomendi conatu (mit einem erschrecklichen Würgen) eructabatur. Laxatis hinc per septem horas constricta linguæ vinculis fermonis quædam rediit facultas; ipsaque pharyngis rigida detentio aliquantulum soluta fuit, ut liberius deglutire valeret: ipsa tamen gulæ inferioris ac pectoris angustia adhuc urgebat, qua deglutita in ipso œsophago stagnare nec ad ventriculi cavum pertingere videbantur. Nec vero ullæ medicinæ, nec antispasmodici pulveres, nec anodynus liquor; nec pediluvia nec sperma ceti in oleo amygdalarum dulcium solutum nec alia quicquam opis adferri valebant. At enim vero cum camphoræ duo scrupuli in oleo olivarum soluti ex errore uno haustu assumerentur: fontica quidem insequiebantur symptomata; æger vero ab omni constrictione liber, & dein a toto morbo liberatus fuit.

### §. III.

Hoc in casu constricta fuisse, pharyngis, linguæ, laryngis, ossis hyoidis musculos, gulam ac ipsum ventriculi superius os, jam proluxa demonstratione ostendere velle, & chartæ angustia prohibet, & supervacaneum est; cum id cuique sponte facile adpareat. Hinc jam historiam allegabimus, qua pharynx constrictus, reliqua vero gula libera fuit; quæ pariter in *Excell. PRÆS. Med. Consult. Tom. I. Dec. V. Casu IV. continetur*: Vir quidam admodum biliosæ constitutionis ex nimia iracundia ac perperam insuper datis medicinis post prævias quasdam afflictiones in gravem demum incidit pharyngis constrictionem hisce potis-



tissimum notis manifestam : Per intervalla ægro accessit molesta in faucibus instar pali infixi sensatio , qua simul percipiebat , ac si aliquid ex ore sit ejiciendum & quasi proserpere velit , ut etiam medicus cum ægotante putaverit , vermem ibi residere & exitum affectare. Sub accessione partes extremæ valde frigescere incipiebant sub calidissima etiam æstate , a frigore admissio semper malum ingravescere videbatur : & quandoque tremor extimas partes concutiebat : alvus erat sicca & obstructa , abdomen flatibus distentum , appetitus & somnus valde exiguus , pulsus durus , urina limpida , insignis ad iram propensio , horumque omnium ab assumpto quodam purgante summa exacerbatio. His per aliquot septimanas sollicitatus æger symptomatibus , tandem antispasmodicis medicinis reddebatur sanitati.

#### §. IV.

Liberam hic fuisse gulam vel exinde patet , quod deglutita sine ulteriori molestia ac impedimento in ventriculum penetraverint : pharyngis vero detentionem & deglutiendi difficultas & pali faucibus infixi sensatio demonstrant. Sed restat , ut adhuc gulam inferiorem , humani pharyngis , convelli casu comprobemus ; quem pariter ex *illustris PRÆSIDIS Med. Consult. Tom. III. Dec. III. Cas. VII.* mutuatum sic recensemus : Vir annorum LXV. ex hæmorrhoidum suppressione , aut saltem irregulari fluore variis hypochondriacis molestiis per aliquot annos sollicitatus , ventriculi post assumptionem parcissimi etiam cibi inflationem , flatulentiam , alvi obstructionem , quandoque profluvium , adpetentiam fere caninam , dorsique cruciatus toleravit. His demum omnibus ea supervenit afflictio , ut libera quidem cibos potusque devoraverit deglutitione ; cum autem

tem



tem ventriculum ingredi vellent, in œsophago quasi vinculis constricto hædere nec ulterius progredi posse viderentur: ea tamen differentia, ut calidi potus libero gauderent transitu, frigidi autem malum exasperarent, & fere regurgitarent; quibus denique sæpenu-mero muci vomibunda accessit rejectio.

§. V.

Ex his igitur adparere confido, divisionis nostræ non cerebrinum, sed ipsa experientia confirmatum esse fundamentum: jam opus erit, ut singulorum rationem mechanicam, indolem, signa, symptomata, causas, prognosin ac medelam prosequamur; ex quibus demum essentialis horum spasmodorum differentia elucescet. Nos vero pharyngis duntaxat convulsionem perscrutabimur, melius rati, unius morbi genuinam indolem uberius explicare, quam variorum simultanea tractatione ea confundere, quæ actu sunt distinguenda. Namque inferioris gulæ spasmi adeo sunt comparati, ut illis peculiaris labor deberi videatur: non enim solum ea ratione, quam proxima exhibet periodus, sese exserunt; verum innumera adfligunt varietate & quam plurima involvunt symptomata singulari animadversione digna. Pharyngis itaque spasmodis inhærentes, hujus præcipue fabricam ac structuram præmittemus; quo dein facilius adpareat, qua ratione ipsi vitia insidere queant.

§. VI.

Ab ultimis faucibus incipiens canalis, quem gulam appellant, latius ac amplius in suo principio sortitur cavum, quod græcis pharynx, latinis infundibilum audit, & antrorsum linguæ radici, ossi hyoidi, laryngique, retrorsum colli vertebrae arctissime connectitur, ut



una parte mota altera sæpissime simul moveatur. Quemadmodum vero œsophagi ea in genere est functio, ut mansa, saliva permixta ac in ore præparata deglutiat, ac in ipsam demum ventriculi cavitatem dimittat: ita præcipue illius principio seu pharyngi deglutiendi provinciam natura imposuit. Hic etenim deglutionis actus unice dependet a fabrica pharyngis; qui eundem in finem variis musculis & dilatatoribus & constringentibus construitur ac movetur. Constringentium unum revera par existit, quod tribus originibus ab osse hyoide, cartilagine cricoide, & thyroide exortum, hinc præter necessitatem a VALSALVA *tr. de aure humana Tab. V. § VI.* aliisque tribus nominibus hyo - thyro - crico pharyngæorum insignitum, os superius œsophagi seu pharyngem circum circa amplectitur, illud constringendi vi pollet, & œsophagæi communiter seu sphincteris gulæ nomine venit. Dilatatorum vero tria potissimum sunt paria; quorum primum cephalo-pharyngæum ab infima occipitis parte & primæ colli vertebra ortum recta via in tunicas pharyngis expanditur: alterum sphæno-pharyngæum, sub quo complectimur pterygo-pharyngæum, ab osse sphænoideo, ejusque alaribus maxime processibus in latera pharyngis abit; & tertium stylo-pharyngæum ab apophysi ossium temporalium styloformi lateribus pharyngis inseritur. Hæc tria musculorum paria non solum posteriorem infundibuli regionem elevant, sed quoque illud sphinctere occlusum dilatant.

#### §. VII.

Musculorum horum beneficio pharynx deglutionis actum, tanquam functionem sibi propriam peragit:



git: cujus hæc est mechanica. Dum dorsum linguæ ope musculorum mylo-glossorum, stylo-glossorum, stylo-hyoidæorumque ad palatum applicatur; radix linguæ, os hyoides ac larynx musculis huic actioni infer-vientibus antrorsum premuntur; pharynx vero posterius a constrictis cephalo-pharyngæis elevatur, antèrius a stylo- & sphæno-pharyngæis dilatatur. Hic harum partium actionibus ante membranas colli vertebrae & pharyngem cingentes, sub velo palatino, uvula, tonsillisque & supra laryngem atque pharyngem amplius redditur spatium, majusque cavum: tum vero deglutien-da dorso linguæ imposita inter eam & palati fornicem premuntur, & sic pressa supra laryngis rimam operculo cartilaginis seu epiglottide clausam veluti per subje-ctum pontem in cavum illud faucium propelluntur. Tunc actio antagonistarum excipit: namque hæcenus elevata, antrorsumque compressa lingua, larynx, os ypsil-oides pristinae restituuntur figuræ; laryngis maxime cartilaginee explicatae ad pharyngem premunt, hacque actione deglutienda in cavo hærentia ulterius pellunt; quæ laxatis simul pharyngis dilatatoribus constrictoque œsophagæo magis protruduntur, & sic constricto ite-rum pharynge sub hoc in cavo gulæ hærent. Tunc ab-soluta est deglutitio; cujus nomen deglutitorum ulte-rior per cavum œsophagi rore glandularum lubricum vi musciosa ipsius fabricæ propulsio in ipsum ventri-culum nullo meretur jure; licet vulgo hoc quoque sen-su adhibeatur.

§. VIII.

His præmissis spasmus pharyngis describimus, quod sit invita, præternaturalis, violenta musculorum



pharyngem constituentium constrictio, deglutitionis majus minusve impedimentum inferens. Læsa etenim parte læditur illius functio; quam obrem operæ jam erit pretium ante omnia explicare, qua ratione deglutitio per spasmum pharyngis reddi queat difficilis; quod eo magis erit necessarium, cum ab aliis quoque infundibuli vitiis, ut atonia, inflammatione ac obturatione per res peregrinas tumoresve deglutiendi summum introduci observetur impedimentum. Quare haud ignorari oportet, ad omnium machinæ humanæ musculorum hinc & pharyngæorum actionem rite absolvendam requiri justam ac naturalem eorum tensionem, quam medici vocant tonum, aut motum tonicum. Hunc si præternaturalem sortiuntur partes musculosæ, aut auctum, qui spasmi nomine venit, aut imminutum, quem atoniam dicunt, aut plane abolitum, quem paralyfin vocant: aut imminuitur, aut impeditur, aut plane aboletur earum partium actio atque functio. Idem fere accidit musculis infundibuli, qui & resoluti & distenti deglutiendi secum ferunt difficultatem. Quæ vero hujus rei ratio? supponimus ex musculorum cognitione, horum plerosque habere antagonistas; qui, congeneribus agentibus relaxati, his laxatis constricti sunt. Eadem in præternaturali distentione fieri ratio suadet: ubi si congeneres spasmo trahantur, antagonistas leviori atonia adfici necesse est, & vicissim. At enim vero in pharynge dilatatores sunt congeneres, qui simul quosdam linguæ, ossis hyoidis, laryngisque musculos habent socios; antagonistæ vero œsophagæum, & quosdam dictarum partium sortiuntur. His ergo constrictis, illi relaxantur: illis convulsis, hi aliquantulum resoluti sunt.



sunt. Jam vero utraque ratione spasmus pharyngis contingere posse, non solum ratio ostendit, verum etiam mox recensenda symptomata non semper eadem, sed valde variantia comprobant,

§. IX.

Explicanda itaque jam sunt spasmodorum pharyngis signa atque symptomata, priusquam ipsorum ab a-tonia aliisque malis ostendamus differentiam. Ea vero sunt vel aliis quoque superiorum partium distentionibus communia, vel hisce propria. Inter communia sunt extremorum, maxime pedum, refrigerationes; externorum artuum tremores ac rigores; alvinæ excretionis obstructions ac constipationes; flatuum ad superiora regurgitationes; imi ventris strictiones, dolores, murmura; præcordiorum angustia, vomendi conatus, cardialgia, urinæ tenues, aquosæ, pallidæ; pulsus duri, magni; & denique ipsius affecti loci sæpius & vicinorum aut rigores, aut dolores aut immobilitas. Quum enim superiorum partium constrictiones non nisi humorum per distentiones inferiorum partium ad superiora compulsionibus natales suos debeant: facile adparet, unde recensita symptomata, quæ spasmodorum omnino sunt progenies originem trahant; quibus explicandis jam non est idonea occasio. Hinc potius ad signa spasmodis pharyngis propria accedimus; inter quæ potissima sunt 1) deglutitio difficilis, dolore stipata, aut plane nulla cum solidorum tum liquidorum, 2) partium pharyngi coherentium, linguæ, laryngis, colli rigida constriction, impeditus motus, dolor, 3) suffocativa molestia, 4) sensatio pali faucibus infixi, ac si quicquam inde vellet proferpere, 5) quæ demum omnia sæpenu-



mero per intervalla adfligunt, ac 6) haud raro in universi generis nervosi convulsionibus terminantur.

### §. X.

His præmissis facilius tradetur iudicium de deglutione difficili; quæ occurrit in pharyngis inflammatione, atonia, obturatione a re quadam ipsi inhærente, & denique spasmis. Namque ubi atonia subest, ea difficilis deglutionis est indoles, ut solida liberius deglutiantur, quam fluida atque liquida: eaque difficultas perpetuo sine ulla remissione inhæreat. Observavit illud non solum FORESTVS, si L. XV. obs. XXX. schol. pag. 150. dicit: in resolutione quidem devorari possunt, quæ sunt consistentia, spissa; liquida nequaquam: verum etiam confirmat casus ab Excell. D. D. PRÆS. in Med. Consult. Tom. X. dec. I. casu VI. allegatus, ubi pag. 36. exstant verba: Es ist zu verwundern, daß eher etwas grosses, als kleines nur schlüpfgeriges hinunter geht. Hinc pharyngis atoniæ si accesserit laryngis quoque imbecillitas; solida quidem liberius devorari observantur, cum epiglottidem comprimant: liquida vero dum magis in apertam penetrant laryngem, sæpenumero cum suffocationis metu per os atque nares regurgitant. Contra vero in ea deglutionis difficultate quæ spasmis pharyngis debetur, præter alia signa ab imbecillitate aliena, & solida & fluida eodem devorantur impedimento; ipsaque sæpius haud continenter urget. Quod si autem perfecta præsto sit paralyxis, qualem casum TVLPIVS refert. Lib. I. cap. 44. omnis deglutiendi potentia penitus aboletur, ut ægri fame perire debeant. Partium vicinarum simul magna est mollities atque flacciditas; faciei pallor, aliaque signa, quæ ex capite de paralyxi re-

peten-



petenda sunt. At vero licet & sub spasmo omnis deglutitio tollatur : attamen brevi iterum aut felici aut mortifero eventu discutitur atque mitigatur, & per periodos insultat. Deprehenditur insuper vasorum faciei intumescencia, illius rubor, ac partium distentarum rigores, qui paralyfi nunquam sunt familiares. Hic sane iudicio opus erit Medico, ut ex reliquorum caterva signorum conjiciat, quodnam horum ex adverso sibi contrariorum vitiorum in culpa sit.

## §. XI.

Facilior est diagnosi difficilis deglutitionis, quæ a faucium inflammatione, quam anginam vocant, proficiscitur. Tum enim faucium atque linguæ intumescencia, atque rubor ore aperto sæpius conspiciuntur; ardor faucium molestat peracutus; dolor urget eximius, ac plerumque gravissima jungitur febris. Sæpius ulcera pharyngis deglutitionem impediunt; quæ si inflammationem harum partium exceperint, facillime cognoscuntur, nec prolixiori explicatione indigent : nec minus venerea variis sese prodent notis. Denique imponere valet medicis tumor, excresecencia, aut frustum aliquod pharyngi in hærens, aut laryngis vitium præternaturale, ut prognatam ex hisce malis deglutitionis difficultatem ipsasmo attribuant *Conf. FORESTVS L. XV. obs. 28.* Tali vero casu candela cerea faucibus intrusa haud raro rem manifestabit; ut taceam in spasmodorum præsentia ad reliqua simul respiciendum esse signa; ex quibus collectim sumtis facile judicare poterit artis peritus, quod morbi genus deglutitioni obicem ponat.

## §. XII.

Sed revertamur ad spasmodorum nostrorum sympto-  
mata,



mata, quæ inter sensatio illa pali faucibus infixi aliquam meretur considerationem. Dictum fuit §. 8. non minus dilatatoribus pharyngis musculis, quam constrictoribus inhærere posse præternaturalem constrictionem: jam vero in eo casu, ubi hoc urget symptoma, spasmus maxime dilatatorum peccare persuasi sumus. Namque dum hi muscoli posteriorem potissimum regionem infundibuli occupantes, ( quæ etiam ipse locus hujus sensationis existit ) præternaturaliter convelluntur: antrorsum magis trahuntur in conglobatam figuram, quæ, cum spasmus pertinaci rigiditate inhæret, diu sensum illum excitat pali infixi. Hac itaque ratione licet dilatatus atque apertus sit œsophagus; nihilotamen fecius difficilem exhibet deglutitionem; cum dilatatoribus rigidis, sphinctere laxato difficilius constringatur; quæ tamen constrictione ad deglutiendum necessaria est: *vid. §. 7.* Inde vero deducimur ad considerationem differentię ipsius spasmi pharyngis; qua ille haud sine ratione in idio-pathicum dividi potest, & symptomaticum. Illum appellamus constrictionem musculorum dilatatorum pharyngis; hunc convulsionem œsophagei: illum rariorem credimus & adeo comparatum, ut in solis hisce musculis, reliquis vicinarum partium liberis tyrannidem exercere queat: hunc frequentissimum putamus, qui ex adjacentibus partibus spasmo primario adfectis ad œsophagum per consensum propagatur aut ex hoc ad illas. Verissima sane distinctio, cui & ratio suffragatur, & experientia calculum addit. Namque si situm atque fabricam harum partium intuemur, facile deprehendemus, soli œsophago absque laryngis aut linguæ vitio nullum contingere posse

spas-



spasnum. Ille enim solus a trium dilatatorum vi facilius superabitur, ut se constringere nequeat; verum vi muscutorum laryngis aut hyoidis ossis quorundam adjunctus dilatatorum potentiam omnino superabit. Insuper sphincter ille a larynge & osse hyoide originem suam mutuatur, ut adeo fere impossibile videatur, convulsis hisce partibus sphincterem manere liberum. Contra vero dilatatores haud adeo arctis illis partibus uniuntur vinculis; hinc & solos constringi, & sphincteris resistentiam superare posse, videtur vero simillimum. Hinc etiam si observationes §. 2. & 3. citatas rite examinemus; inveniemus §. 2. symptomaticum, §. 3. idiopathicum pharyngis spasnum: hic sola pali infixi sensatione, & difficili deglutitione se exseruit, absque spirationis molestia; ille vero præter deglutiendi summum impedimentum, linguæ impotentiam, & insignem spirationis difficultatem habuit comites. Nec quoque mirum: constricto enim penitus œsophagæo nihil gulam ingredi potest; & convulsis linguæ laryngisque musculis, cum sermo impeditus, tum spiratio fuit vitiata. Hinc ergo suffocationis motus gulæque constrictio ad symptomaticum pharyngis spasnum referantur, necesse est.

§. XIII.

Sic explicatis indole, signis, symptomatibus ac differentia spasmodorum pharyngis, ad eorundem causas provolvimur. Has inter proxima, quæ ipsum morbum constituit, satis exposita videtur: quare ad remotiores five occasionales progredientes, harum efficacissimam deprehendemus in animi commotionibus sitam esse: pauca enim sunt, quæ facultates omnes corporis nostri dejicere æque valeant, atque immensi animi motus, in-



quit **MERCVRIALIS** *Consult. Med. Tom. I. consult. 99. pag. 129.* Maxime omnium huc facit insignis excandescencia, cujus ea potissimum est indoles, ut constringendi efficacia in corpus nostrum sæviat. Hujus exemplum vide in *Excell. PRÆS. Med. Consult. Tom. I. dec. V. casu IV.* Ad hunc causarum ordinem referendum quoque est fastidium, licet hoc pharyngis spasnum atque difficilem deglutitionem magis transitoriam producere observetur. Deprehendimus enim quotidiana fere experientia; quod si jam masticatus ac in ore præparatus sit bolus, & accedat alicujus rei nimium fastidium, nos vel plane non vel insigni saltem impedimento bolum huncce deglutire valeamus. Admirandum sane mentis cum corpore commercium; cujus licet intimiorem rationem ac indolem cognoscere haud liceat; id tamen nobis erit satis, quod observemus, hos animi motus, qui in fastidio occurrunt, sequi potissimum gulæ ac faucium constrictionem.

#### §. XIV.

Non minus pharyngem ad graves constrictiones, quin & inflammationes proritare valent assumpta quæcunque acria, non solum alimenta, verum etiam medicamenta, maxime purgantia ac emetica drastica; quæ si non inducunt, insigniter saltem exasperant hocce malum, uti ex allegato in *Med. Consult. casu* videre licet. **HOECHSTETTERVS** *obs. dec. 3.* mentionem facit adstrictionis gulæ ex potu vini Malvatici, in quo radix consolidæ majoris infusa fuit. Quo vero tenerius fuerit corpus, quoque sensibilibior constitutio, eo facilius acria hæc effectus suos edere apta sunt. Eo magis hoc continget, si assumpta fuerint caustica, ut adeo non mirum,

rum, quod juxta FORESTVM *Lib. XV. obs. 30.* puer quidam ex aquæ fortis haustu insignem pharyngis occlusionem cum ipso suffocationis motu incurrerit. Maxime omnium talem tyrannidem exercent quædam venenorum, & præcipue mercurius sublimatus, faucium constrictione sui ingurgitationem semper indicans, cujus quoque casum vid. *apud. FORESTVM loc. cit. schol. pag. 150.* Huc fere pertinere videtur casus a MERCVRIALI *consult. med. Tom. I. consult. CXI. pag. 144.* recensitus de Imperatore Maximiliano II. ex veneno assumpto palpitatione cordis, & deglutiendi difficultate, aliisque symptomatibus diu sollicitato.

#### §. XV.

Deinde vero præsens malum sæpenumeto a viscido muco faucibus inhærente, aut cruore in illis stagnante natales suos mutuatur: hinc quoque explicandum erit, quod in casu §. 2. allegato & linguæ impotentia & pharyngis adstrictio post ore redditum copiosum ac viscidum mucum evanuerint. Eadem est ratio, cur hypochondriacis viris admodum familiaris sit pharyngis distentio cum strangulationis metu sociata. Dum enim inferiorum partium spasmodicis constrictionibus, humores magis ad superiora compulsi, ibidem stagnant: non solum fauces ad violentas convulsiones proritant; verum etiam in cerebro atque ad nervorum principium subsistentes, apoplecticos ejusmodi insultus procreare valent: quos *Excell. PRÆSES Med. Consult. Tom. VIII. Dec. IV. Cas. V.* non immerito apoplexiæ hypochondriaco spasmodicæ nomine insignit. Neque enim ignorari oportet, sanguinem circa nervorum origines ac principium stagnantem, aut serum acre ibidem hærens non



semper paralyticos affectus inducere, sed haud raro in convulsivas nervosi generis agitationes terminari: id quod WILLISII observatione aliquantulum confirmatur, qua ille *Lib. de morbis convulsivis Cap. X. pag. 165.* se in muliere hysterica suffocatione defuncta principium nervorum sero acri madidum invenisse memoriæ prodidit. Idem vero constrictionis gulæ fundamentum est, quæ colicis virorum convulsivis accedere solet; qualem casum de colica gravem cephalalgiam ac maniam cum cæcitate & impedita deglutitione inducente refert HOEFERVS *in Hercule medico pag. 185.* Quis enim non videt, hisce omnibus spasmodicam faucium adstrictionem subesse? Qui rite meditatur morbos istos, eorumque symptomata, nostris haud opus habebit demonstrationibus.

#### §. XVI.

Clarissimum spasmi pharyngis symptomatici exemplum habemus in suffocatione ista hysterica vel uterina, quæ & viris hypochondriacis & fœminis hystericis familiaris, in his die rechte Mutter-Beschwerung, in illis der Männer rechte colique vocatur. In hoc etenim malo præter alia symptomata & summam spirationis angustiam percipitur colli ac faucium insignis coarctatio, & constrictionis quidam sensus non secus ac si laqueo injecto fauces præcluderentur. *Conf. ETTMULLERVS Collegii præct. Sect. III. Cap. III. pag. 963. seqq. & HELMONTIVS tr. de asthma & tussi §. 31.* Non minus ipsæ epilepticæ ac convulsivæ accessiones hoc secum vehunt symptoma, ut vel difficillima vel plane nulla esse soleat deglutitio; quemadmodum præcipue in incubo observare licet, ubi præter strangulationis sensum, linguæ impotentia ac de-

glu-

glutitionis impedimentum adfunt. Idem quoque vitium opisthotono familiare est: sicuti ex casibus de hisce morbis a FORESTO *Lib. x. obs. 112. & 113.* recensitis colligi potest. Ex vermibus vero stupendæ convulsioni ac contractionis faucium exemplum recenset THONERVS *Lib. 2. obs. pag. 94.* Et denique quæcunque causa ad laryngis constrictionem disponere valet; ea quoque sæpissime pharyngis spasmodum inducere observatur. Neque tamen silentio prætermittendæ sunt febres acutæ malignæque; quæ haud raro faucium adstrictionem, difficilemque deglutitionem molestos habent comites: uti quoque sæpenumero in vulneribus accidit.

#### §. XVII.

Hæc de causis spasmodorum pharyngis dicta sufficiant; transeamus ad tradendam prognosin. Haud sane insuper habendi idiopathici pharyngis spasmi, quippe qui non solum chronicam indolem, fixamque sedem, accedente maxime perversa medicatione obtinere solent; verum etiam perversum motum facillime universo generi nervorum communicare observantur; sicuti ex casu in *Med. Conf. Tom. I. pag. 232.* clarius adparet. Vnde sane qui sæpius in hunc morbum recidunt, habent cur suæ valetudini metuant. Præcipue vero ii, quos acria ac caustica assumpta produxerunt, spasmi periculo non vacant, & inflammationem haud raro habent comitem. Qui in hypochondriacis atque hysteris cum suffocatione sæpius eveniunt, metum veræ omnino incutiunt apoplexiæ. In vulneribus si accidat ex convulsione læsa deglutitio, malum, teste ETTMVLLERO *Coll. Pract. part. I. pag. 57.* Neque minus periculum minatur fau-



cium constrictio acutis malignisque superveniens febribus; & HIPPOCRATES *aph. 35. sect. 4. si febre, inquit, detento repente collum intorquetur, ut vix deglutire queat, nullo existente tumore lethale est*; quem aphorismum male quidem de angina interpretari volunt, cum juxta ETTMVLLERVM *Coll. pract. Part. 1. pag. 802. ad emprosthotonum sit referendus*. Ceterum spasmodorum pharyngis symptomaticorum periculum pro primarii morbi magnitudine erit dijudicandum.

### §. XVIII.

Sed denique curationem molesti hujus morbi aggressurus, & quidem idiopathici; eo omnes nervos intendere debet, ut constrictiōnem eam sopiat, motus perversos a superioribus derivet, ac omnes materiales causas removeat. Quod si enim primæ viæ fordibus impuris, acribus, acidis aut viscidis imbutæ fuerint, quæ reliquæ curationi exiniām injicere valent remoram: iis ante omnia leviter expurgandis operam navare oportet. Huic scopo minime omnium quadrant vehementiora purgantia, quippe quæ malum longe pertinacius reddere observantur. Vid. *Med. Conf. Tom. I. p. 233*. Magis e re erunt leviora rhabarbarina, aut mannata; uti potiunculæ mannatæ & gratissimi saporis & præstantissimi effectus; quarum varias compositiones in *Excell. Dn. PRÆSIDIS Medicina consultatoria* passim invenies. Nec minus operæ erit pretium clysteres injicere, maxime si flatulentæ distensiones ac murmura intestinorum canalem occupant. Quandoque humorum vitalium insignis urget copia, quæ malis hisce adaugendis efficacissima est: ipsa erit ventila-

tilanda per congruas venæ sectiones, melius extra morbi accessionem instituendas. Fugienda vero cane pejus & angue sunt omnia & alimenta & medicamina calidiora ac acriora, quæ non minus humores commovere, quam ipsas constrictiones exasperare solent.

### §. XIX.

Ipsam vero faucium distentionem consopiendo præstantissimam vim possident & internæ antispasmodicæ ac anodynæ medicinæ, & externa paregorica. Ad censum earum pertinent pulveres antispasmodici cinnabarini, & instar omnium *Excell.* PRÆSIDIS liquor anodynus mineralis aut solus, aut cum essentia castorei, aut cum quibusdam olei chamomillæ veri, absinthii & de cedro italici guttis maritatus. Nec ludetur opera, si sperma ceti cum oleo amygdalarum dulcium vel olivarum mixtum exhibeatur; cui quoque usui convenientissimæ sunt pilulæ antispasmodicæ vesperi quoadque capiendæ; quarum in sæpius citata *Med. Conf. Tom. I. pag. 234.* hæc existat compositio: Recipe extracti millefolii, chamomillæ ana drachmas duas, extracti hyperici, mithridatii ana drachmam semis, croci, castorei pulverisatorum ana grana XV, olei destillati niacis guttas VI, M. F. pilulæ, quarum XX uno haustu deglutiuntur. Inter externa adminicula summam laudem meretur *Excell.* PRÆSIDIS balsamus vitæ, linteo infusus, & externæ faucium regioni adplicatus; nec contemnendum usum exhibebit theriaca aliquot granis ore detenta, ac iterum reddita. Quibus denique si pediluvia ex aqua fluviatili, fursuribus triticeis, & floribus chamomillæ parata accesserint, quorum in deri-



vandis superiorum partium motibus egregia est efficacia: non dubium est, quin de diro molestoque hoc morbo triumphum finis deportaturi.

## §. XX.

Prius vero, quam ad alia transeamus, haud alienum erit camphoræ virtutem antispasmodicam binis tantum attingere verbis; quam præcipue demonstrat casus *in Medicin. Consult. Tom. VIII. acc. IV. Cas. V.* allegatus, lectu dignissimus. Admirandus est illius effectus, quem in dicto casu ad duos per errorem scrupulos assumptus præstitit; omnes enim faucium pectorisque constrictiones, nullis fere medicinis anodynis debellandas, protinus expugnavit. Hinc nec operam ludi arbitramur, si in pertinaci pharyngis constrictione, duobus duntaxat granis inter alia medicamina exhibeatur. Neque enim tantam humorum commotionem inferet, quantà ipsi vulgo adscribi solet. Conf. *Excell. PRÆS. disp. de usu camphoræ interno & securissimo & præstantissima.* Eo magis erit necessarium, internis æque, si possibile est, ac externis paregoricis antispasmodicis, anodynisque medicaminibus illi faucium constrictioni succurrere, quæ sub levioris apoplexiæ specie cum adnexarum partium rigida distensione occurrit. In his quoque accessionibus, si rubor faciei, vasorum inflationes ac graves magnæque pulsationes cruoris significant abundantiam, haud abs re erit venam in pedibus tundere, & satis largam cruoris copiam emittere. Præstantissimam quoque ac præsentissimam opem spondent clysteres injecti; quemadmodum pluribus in allegato proxime casu videre licet.

## §. XXI.

## §. XXI.

Quæ ab assumtis acribus, causticis, venenis originem trahit, pharyngis distentio, ea in genere exposcit remedia, quæ assumtorum virus atque acrimoniam enervant, obtunduntque. Huic scopo satisfaciunt juscula pingua, oleosa, oleum amygdalarum dulcium, olivarum, ipsum lac ac alia mucilaginosa; nec minus quorundam venenorum vim infringereprehenduntur acida, ut oxymel squilliticum &c. Sic HOECHSTETTERVS faucium adstrictionem ex vino Malvatico radice consolidæ permixto enatam acidis debellavit, eandemque ab aqua forti procreatam FORESTVS mucagine cotoneorum in potu data felicissime sanavit. Quandocunque vero præternaturale assumptum adhuc in ventriculi & intestinorum cavitare residet; & ab his partibus motus spasmodicus ad fauces adspiravit; tunc emeticum medicamen propinare conveniet. In paroxysmis hystericarum ac hypochondriacorum suffocativis præter clysmatum adplicationem, e re erit vel graveolentia, vel excitantia volatilia, oleosa, castorina naribus admovere. Vbi autem ignorari non oportet, asam fœtidam, cujus frequentissimus solet esse usus, haud adeo tuto esse adhibendum; quippe quæ generi nervoso majorem inducere valet debilitatem: hujus in locum magis conveniet odor corii oleo betulæ uncti (Zuchten-Leder) uti præclare monuit Excell. PRÆSES Med. Consult. Tom. X. dec, V, casu VIII. pag. 307.



## §. XXII.

Quemadmodum ceterum in omnium symptomatum curatione primarium morbum respicere oportet: ita quoque cum spasmis pharyngis aliis morbis junctis res se habet. Quodcumque enim sub epilepticis, convulsivis accessionibus, incubo, emprosthotono, opisthotono &c. contingunt: eorum morborum expugnatio spasmos quoque faucium tollet. Neque minus si vermium colluvies, aut alia primarum viarum saburra huic symptomati originem dederit; eorum expulsionem per anthelmintica & evacuantia opera danda est. Quæ denique febribus acutis supervenit faucium adstrictio; præter regimen congruum medicinis antispasmodicis ac antepilepticis sublevanda erit; quo spectant pulvis marchionis, nitrum cum camphora mixtum, tinctura bezoardica Michaelis cum mixtura simplici maritata &c. Opiata enim ac crassiora adstringentia his opponere velle, nihil esset, quam oleum cammino affundere.

## §. XXIII.


Quod si demum spasmodorum pharyngis idiopathicorum, qui sæpius recurrunt, ac generis nervosi imbecillitate nituntur, præservationem intueamur; omnis hujus vis in recta vivendi ratione collocanda erit. Hunc in finem omnis frigidus aer, nervis admodum inimicus fugiatur; cibi potusque calidiores, acriores, concoctu difficiliore, chylum viscidum generantes omnino vitandi sunt; maxime animi graviora pathemata, excandescentiæ &c. omni studio abolere  
conve-

convenit, quippe quibus in excitandis spasmodicis commotionibus nihil unquam efficacius deprehenditur. Si quæ forte cruditates ventriculum obsederint, leniter evacuentur; & humorum nimio incremento tempestivis sanguinis missionibus obex ponatur. Ceterum omnium rerum non naturalium usus ita instituatur, ne quid œconomia vitalis inde capiat detrimenti.

## F I N I S.

### ERRATA.

*Pag. 16. fin. penultima Oesophago, Oesophageo.*





NOBILISSIMO ATQVE DOCTISSIMO  
DOMINO CANDIDATO

PRÆSES.

**C**um jam in eo sis, clarissime Dne. CANDIDATE, ut absolutis atque cum laude pertractatis studiis Academicis, praesentem admodum eruditam de spasmodicis pharyngis dissertationem publice meo sub praesidio pro Doctorali Gradu defendere in TE susceperis; non potui, quin brevi & meritissimo industriae TVÆ testimonio TE comitarer. Annus est, & quod excurrit, cum ex Moscovia, ubi per sex annos prospero cum successu Chirurgiam exercuisti, advena, collegiis quae tunc temporis provecioribus praelegebam, casuali atque de simplicium in medicina usu, socium TE adjungeres; mihiq; privatim aperires, TVI quis scopus sit adventus; quod scilicet ingenium TVVM ante plures jam annos in celeberrima Lipsiensium Academia ad Medicinam haud leviter aptatum, in Fredericiana nostra me potissimum duce ulterius excolere atque tam in theoria quam praxeos fundamentis

tis perpolire animum induxeris. Cui quidem scopo feliciter obtinendo, ut privatissimis lectionibus institutiones universæ cultioris Medicinæ TIBI traderem, summopere a me rogasti. Equidem vero tam ob ingravescentis ætatis molestiam quam plurimorum privatiorum atque publicorum negotiorum copiam, licet tunc temporis agre in me susceperim hunc laborem, tamen summo, quem cum aliis, qui idem a me rogabant, crebrius ostendebas, discendi ardore atque desiderio commotus, quo minus honestæ TVÆ petitioni morem gererem, non potui a me impetrare. Neque sane susceptæ atque ante aliquot hebdomades feliciter per Dei gratiam absolutæ, me piget hujus opera; cum tot egregios in discipulis meis viderim fructus; ut & theoria & praxeos rationalis fundamenta, quæ aliis difficillima videntur, facili admodum negotio perspicere atque ad usum applicare didicerint; id quod examinibus, quæ explicationibus meis sæpius adjungere consuevi, satis etiam TV, clariss. Candidate, in singularem mei pectoris lætitiæ probatum reddidisti: Ex quo sane felicissimi TVI ingenii, atque singularis industrie haud obscuras habui notas. Neque vero hæc satis TIBI esse existimasti, sed ut in omnibus, quæ ad Medicinam eruditum requiruntur, scientia generibus TE exerce- res, non solum anatomicis demonstrationibus fre-



quenter interfuisti, sed & ipse in dissecandis atque  
penitus perscrutandis cadaveribus diligentissimum  
TE exhibuisti. Præterea vero & chymiam & pra-  
cticas regulas publice mihi explicanti, & aliorum  
celeberrimorum hujus Academia Professorum lectioni-  
bus theoreticis ac practicis cum usu ac fructu satis  
laudabili TE adjunxisti. Unde & factum est, ut in  
duobus quæ ad Candidatorum artis nostræ profectus  
explorandos suscipere nobis mos est, examinibus, in  
omnibus quæ modo a TE cunque desiderari potue-  
runt, versatissimum TE exhibueris. Quæ igitur  
cum ita sint, non desunt sane argumenta encomio-  
rum, quæ TIBI ab omnibus cumulatissime deben-  
tur. Satis vero sit dixisse: optare nos, ut plures  
TVÆ diligentie relinquant imitatores. TV vero  
divina fultus gratia, quo cœpisti, indefessus perge  
tramite, & TVÆ scientiæ fructibus ut multi cum  
latitia fruantur egrotantes, cura diligenter.

Vale Dab. Hal. d. VIII. Id. Augusti  
MDCCXXXIII.



**Q**Uæ TE, MARGGRAFFI ! per tot discrimina rerum,  
Per varias terras divina potentia duxit,  
Quæ TE jam saluum cathedram conscendere iussit;  
Hæc quoque conatus felices esse futuros  
Faxit, & ad faustos jubeat TIBI cedere fines.

*Hiscæ dignissimo Doctorando Amico suo perexi-  
mio adplaudit*

S. SCHAARSHMIDT,

M. L.

**C**Ur mea, MARGGRAFFI, festis se misceat audax  
Musa TVIS ; & quid carmina tecta velint ?  
Scrutentur scioli ! TIBI cognita nomina, coepti  
Nec TE causa fugit, nec peregrina manus.  
Haud equidem patriæ jubet hæc communio terræ  
Gaudia, nec stirpis fœdera sancta movent :  
Marchia TE primum vidit, mihi Dania nutrix :  
Diffusa sic olim nos genuere loca.  
Ast eadem nobis fuerint quod fata, laborque  
Pectora nostra unus junxerit atque scopus ;  
Quamque velut patriam colui venerorque secundam,  
Russia TE gremio foverit alma suo ;  
Hinc in Apollineis mihi quod pulcherrima castris  
Contigerit mentis noscere dona TVÆ ;  
Hoc jubet ex tenero pia promere pectore vota  
Atque TVÆ, Fautor, carmina ferre togæ.  
Plurima sed paucis voyeam : sine limine crescat  
Sors TVA, cumque bona sorte perennet amor.

*Nobilissimo DN. DOCTORANDO pauca hæc sin-  
cero animo gratulabundus offert*

P. C.

H. D. M. C.



**D**Um TVA Phoebeis cinguntur tempora lauris,  
Et TIBI sacratas pandit Hygea fores,  
Pristina, MARGGRAFFI, pia carmina tempora po-  
scunt;

Musa sed hæc meritis scribere digna vetat:  
Nam majora TVÆ prostant encomia mentis,  
Quam potis est tenuis tradere nostra TIBI.  
Ipseque scripturo gravior mihi Cynthus aurem  
Vellit, & admonuit linquere jura sua:  
Nam mihi discipulos fas est ornare, piisque  
Munera, contendit, digna parare meis;  
Nec sua MARGGRAFFIO, fidum per lustra sodalem  
Quem novi, lubens præmia ferre nego.  
Quid facerem? monitis Domini subjungere mentem  
Cogor; at ingenuas non negat ille preces.  
Fundere vota licet! fundam, mentemque vovendo  
Monstrabo, hocce die, quam reticere nefas.  
Vade igitur felix! peregrinis hospes aboris  
In patriam sospes, incolumisque redi!  
Suscipe virtutis fructus, atque inter honorum  
Augmenta haud pigeat TE meminisse

TVI

*Observantissimi*

N. M. A. P.

*Ph. & Th. St.*

